



16. august 2012

UKA 2012/161

Inatsisartut suleriaasianni § 36 naapertorlugu apeqquteqaat aallaavigalugu imatut oqallisissiamik saqqummiissaagut:

Nunatsinnit efterskolertut angajoqqaavisa pisortanut akiliuteqartitaanngitsumik kiisalu ilinniarnermi tapiissutinik pisalernissaannut ingerlanneqartalersinnaanerannut pillugu apeqquteqaat aallaavigalugu Inatsisartuni oqallisissiamik siunnersuut.

(Inatsisartunut ilaasortat Ruth Heilmann aamma Anders Olsen, Siumut)

Tunngavilersuut:

Ullumikkut efterskolertut angajoqqaavi akiliuteqartitaaneratigut ingerlanneqartup eqqarsarnartuunera arlalitsigut innuttaasunit uparuarneqartarnera akulikilliarporpoq. Sooruna ilinniarnertuunngorniarnarfinni piareersarfinni allanilu ilinniarfinni ilinniarnersiuteqartitsineq kisimi atorneqassava? Sooruna aamma efterskolertut ilinniarnersiutisiaqarsinnaanngillat? Apeqqutit tamakkua innuttaasunit ataatsimiisitsisarnerni saqqummiunneqallattaaleralut-tuinnarput, qulaajarneqartariaqalersutut maanna nunatsinni ilinnianermik pingaartitsiffiusumi isummerfigisariaqalersut.

Inatsisartut aningaasanut inatsisaat 2012-mut, konto pingaarneq 40.10.06 *Kalaallit Nunaanni efterskolit ingerlanneqarnerinut tapiissutit* pillugit ima ilaatigut allassimasoqarpoq:

“Ukiuni atuartitsiviusumi 2008/2009 efterslimiisitsinermik naliliinermi paasinarsisimavoq inuusuttut atuartorpassuit nunaqarfinneersut isorliunerusuneersullu Danmarkimi efterskolinut inuusuttunilluunniit ilinniartitsiviusunut allanut qinnuteqarnissaminut danskisut piginnaanikippallaarsorisut.”

...”Atuartunut inissat ilaat atuartunut atuarniarnikkut naqinnernillu taaguiniarnikkut ajornartorsiutilinnut inissaritinneqarput.”

...”Naatsorsuutigineqarpoq, atuartut 60 procentiisa atuartumut akiliutertik tamaat utertissinnaassagaat angajoqqaat isertitaannut naleqqiullugu.”

Efterskolertarnerup akeerutsinneqarnissaa ilinniarnermullu tapiissuteqalernissaa inatsisartuni oqaluserissallugu pisariaqartutut isumaqarfigaarput. Imatut aamma saqqummersoqartalerat angajoqqaat ilaat qitornartik efterskolernissaminut kajumikkaluartut nammineq pilersuisutut akissaalatitsineq peqqutigalugu tunuarsimaarfigineqartarmat, allaammi akissaalatsisineq peqqutigalugu qitornaminut kaasarmiussaannilluunniit pisaqartitsinatik, inuusuttortatillu illoqtigiit iluanni aningaasarsioqataanissaat uniginartinnerullugu.

Inuusuttut pikkorissaqqinnissaminnut kajuminnerat ajunnginnerpaamik aqutissiunneqarnissaat taparserneqarnissaallu qisuariarfigissallugu pissusissamisoortut isigaarput. Taamaattumik efterskolertarnerup akeerutsinneqarnissaa ilinniarnermullu tapiissuteqarlernissaa misissuiffigisariaqartoq isumaqarpugut, inuusuttut tamarmik efterskolerusuttut assigiimmik periarfissikkumallugit.

Inatsisartuni oqallilluarnissarput neriutugalugu.